

商水縣志


卷之七

名宦 宦跡

鄉賢 政事

忠義 彰善坊

方技 節烈



商水縣志卷之七

人物志

名宦 彰善坊

宦跡

方技

鄉賢

政事 節烈

忠義

扶輿正氣鍾毓爲人立德立功乃堪不朽或當官綏  
猷無貽譏於尸素或居鄉砥行鮮訾議於清評若是  
皎皎固足稱矣下而閭巷之士篤念蓼莪閨闈之姝  
誓操松栢孰非至性不磨爭光日月者乎

因表人物

以上 舊志

名宦

宦跡 附

懷瑾握瑜世不多覩而一行作吏德澤所被殊足

商水縣志

卷之七

一

係人深思商本小邑而來宰是邦者率多名世偉  
人恩威互用寬嚴相濟一時之被德者如沐龔黃  
卓魯之化流風未泯善政難忘俎豆千秋固其宜  
也志名宦以爲南國之棠峴山之石云爾

遠代無考

宋

高若訥并州榆次人神宗時爲縣令邑有職分田而  
牛與種例皆假於民若訥獨廢不耕廷臣薦爲監  
察御史裏行

明

孫元仁直隸丹徒人洪武中爲縣丞以德惠民不尚操切邑人張大兄弟爭田元仁諭以大義其人感激泣數行下遂相讓不復爭田由是境內有仁讓之風

龐 壘四川南充人永樂初知縣事政尚質朴首以興學校勸耕織爲務令民間無尚侈靡以故風淳俗美士民樂業居無幾遷江寧尋擢太常寺卿

劉 漢湖廣麻城人正德初知縣事雅意愛民禮文學之士適流賊劉六劉七餘黨趙燧邢老虎將衆薄城時雉壘卑削漢義激士民百方固守越二日

賊從北門入漢與家人皆自經未卽死賊感其義釋而禮之倉庫無失事聞嘉獎尋以病告歸民人戴慕不忍忘云後以孫貴顯贈兵部尚書

楊一廉湖廣湘陵人萬歷中知縣事政刑嚴明善飭幹無臥牘宿理閭里悍黷者亟擊而一意佐良焉由是盜賊屏息士民樂業有不閉戶不拾遺之風尋調繁江右百姓刻頌幾如峴碑云

以上係舊志

國朝

李蔭祖總督三省部院端肅持躬潔清率下威昭三

省恩被兩河用躋黌宮以光俎豆康熙二十五年十月初八日遵奉 憲文置主人祠

朱昌祚山東高唐人總督三省部院康熙二十五年爲公舉忠烈大臣等事於九月初一日遵奉 撫憲單開銜諱置主人祠諡勤愍

張九徵江南丹徒人康熙三年由進士提督河南學政識鑒淵澄黜陟允當請託不行士子悅服舉卓異從祀學宮

### 宦跡

康起枚直隸滿城人由進士授商水令性仁慈政務

寬簡不尚急苛雅嗜讀書喜激勵後學公務之暇輒與諸生講學論文孜孜不輟邑人士沐其教澤所成就者甚衆康熙二十八年大蝗旱野無青草民食樹皮草根漸次逃散公力請上 憲開倉賑濟又設法安集流亡衆口罄罄始得免於流離之苦一時熙然誦其仁愛殆所在無赫赫名去後常令人思者耶

脩映辰山東單縣人由教諭歷任商水甫下車卽留心民瘼寬嚴得宜不以喜怒爲好惡決獄多所平反時進邑父老訪問民間疾苦事慨然以興利除

害爲己任商邑地勢窪下一經水潦便成澤國邑之西南舊有穀汾二水日久淤塞僅有河形積水經年不斷公奮然曰此余之責也於是鳩工挑濬閱月而工成上接華邑之龍行溝下至項城入潁東西亘百餘里兩岸之田遂成膏壤無復積水之患矣時康熙五十一年也未幾擢異以知州調晉江令邑人建祠祀之至今歌五袴云

吳 燿浙江錢塘人由舉人知商水縣事姿性英爽諳鍊世故決獄平恕人不忍欺政簡刑清吏民安閒至如禁胥吏禮賢士鋤強撫弱其大較也雍正

元年九月涖任未踰月值黃河決口水勢驟至周家口河北一帶庄村街市悉被衝沒沙河南岸危若呼吸市人奔走號呼悉爲避水計公聞報卽揮淚單騎馳視而堤岸已多蟻穴汪洋矣兼之陰風怒號濁浪排空幾潰而南公命盡拘客船排列南岸以防風浪衝擊旋鳩工數千人負土斬木填穴幫堤往來指揮兩餐俱廢饑則持餅啖之有進飲食並請公歇息者輒潺然出涕曰百萬生靈在此一刻忍自安逸乎盡却之由是士民感泣修築異力如是三晝夜始得保全無事沙河以南得不沒

於波濤者公之力也邑人感德爲勒石曰吳公堤并樹柳以志之又護城河堤舊卑薄一遇水發繞城悉爲水鄉雍正二年沙河決堤幾潰公昌風雨沿堤奔走賞夫修築其忠勤救人之心悉如修沙河堤然及水平又自董家壩至華家河編置四號不時幫修近城數十里至今永享其利豈非禦大災捍大患者乎尋以治水方畧調補儀封令

鄉賢

政事附

士之立不朽之業而可法可傳者山陬海澨之間未嘗無人商雖僻處一隅豈無表表人羣足爲綱

商水縣志

卷之七

五

常砥柱者乎試一爲之屈指某也策名天家而政績著美某也安處窮廬而學行優長古所謂鄉先生歿而可祭於社者其在斯人歟生斯土者亦可知所觀法矣

遠代無考

宋

張 輅家世忠孝性沉靜有識鑒博學善屬文以子封著作郎鄉人推典型焉

姚仲孫登進士第累官至河北督轉鹽運使典鹽筴會計清楚修城壘捍衛有功遷龍圖閣直學士

明

謝直方居心端正制行高潔鄉人仰之如泰山北斗  
云洪武十九年舉賢良方正仕至福建布政司左  
叅議

華 能由貢士任真定府同知政尚寬平教民必躬  
修以先之棘園蛸羅而武悍已遠矣以病歸里閭  
巷式之若萬石君焉

王 溢由舉人除太常寺丞尋陞通政司左叅議  
采峻整言詞嫻雅上甚眷顧將不次擢用以病卒  
於官天順七年遣禮部侍郎李紹賜祭

商水縣志

卷之七

六

王 相榮之子由進士除博士尋擢御史時年方二  
十有奇幼登巍科任顯秩務單厥心知無不言一  
時有鐵面之譽卒爲當道者所忌謫縣丞轉府同  
後陞浙江按察司僉事所至稱仁明焉民懷其德  
鄉高其行蓋迄今不忘云

王 榮溢之子由景泰庚午舉人任山東海豐知縣  
政治寬平不事操切關心民瘼有不便者更而張  
之好惡允協輿情有古循良之風焉  
以上係舊志

國朝

李震普邑貢生候選知州

誥封奉直大夫生而明敏好學力行雅不與俗伍孝友其天性也父病痿輒號泣籲天求以身代父尋愈友愛兄弟有推梨讓棗風事繼母以孝稱至其早納國課設塾延師築河堤而恩及萬民立義塚而澤逮枯骨又其行之卓卓者所謂富而好禮者庶無媿歟典型一鄉固其宜矣闔學公舉於乾隆十一年從祀鄉賢

政事

李振奇邑拔貢生任江南如臯縣知縣時鄭賊叛逆

商水縣志

卷之七

七

東方擾亂公以民牧身任戎事固城禦寇保义黎庶爲一方之保障至其才學兼優人品端方又商民中之翹楚云

楊思震邑舉人天性孝友五世同居任息縣教諭二十餘年教士子嚴而有法以卓異陞四川墊江縣知縣愛民如子兩袖清風惜歷任未久遽以疾卒於官不得盡展所學云

高 猶字允猷號毅齋性孝友品行端方強學力行得鷺湖鹿洞薪燈領康熙辛酉鄉薦秉鐸宛南下車卽整飭學宮勸諭士子務使學行兼修又立考

課之法嚴爲去取賞罰必明士子鼓勵文風由此  
大振自

國初以來無登賢書者垂五十年迨甲午科而一榜獲  
售者二焉嗣是而科第蟬聯不絕矣 方伯李公  
高其學行欲以卓異舉於

朝公固辭之其年湖廣鄉試禮記闕員聘爲同考所取  
七人皆名下士云

喬履信字實夫號敦峯幼聰穎善讀書天性仁孝夙  
承庭訓未弱冠補博士弟子員年二十一領己酉  
鄉薦明年成進士雖少年登第而謙謹自持粥粥

若無能者居平溫厚和易臨事則明敏決斷與人  
交開誠布公然諾不欺奉

旨發陝西學習甫下車卽委署郿篆所至興利除害政聲  
卓卓未幾調富平富俗故多澆漓公以醇樸化之  
尤以培養人材爲己任捐俸創修書院買田百餘  
畝俾士子肄業其中暇則爲之講學論文一時文  
風翕然丕變以能聲遷咸寧令會有保舉御史之  
旨大學士史列名薦牘奉

旨以御史轉授禮部主事一時都下想望丰采並以覘其  
才猷乃於丙寅春捐館舍去卒年三十八歲朝士

多爲扼腕之云所著有鄉甲條約一冊陝西通志  
三卷富平志八卷寧遠堂詩艸一卷

孝義

孝發於天性之眞義激於天理之公二者生人之  
大節也幸生

盛世沐浴於久道化成之中雖鄉曲僻壤亦必有一二  
孝子義士出而爲名教生色者於此見正氣所鍾  
不限於地亟取而表章之而頑廉懦立庶可風百  
世歟

前代無考

商水縣志

卷之七

九

明

張景昭邑人父母歿廬墓三年齊衣蔬食負土起塚  
有元兔穴其旁赤芝生其上人以爲純孝所感事  
聞嘉獎至今相傳猶名其地爲景昭墳云在縣東  
南三里

董正誼邑庠生幼知孝愛稍長竭力奉養期於盡權  
一日母病湯藥無効乃禱於天願以身代復割股  
以供母病尋愈知縣匾其門以旌之

郭峻極邑庠生性淳朴盡孝道父母歿殯葬有禮廬  
墓三年知縣郭天璟旌表其門

劉嘉允邑庠生河間別駕劉芳之子也天性篤孝別駕公疾衣不解帶湯藥必親嘗及別駕公卒事母益謹辛巳十月之變城將陷家人相率請允逃難允曰吾母八旬若草露倚我而生我去母將安賴城破負母走賊皆哀而釋之最後遇一賊殺其母劫允使從允大罵曰賊奴無君更使我無親乎吾將從母遊地下耳賊遂殺之至死罵不絕口  
以上四人從祀忠義祠

郭 琇邑人萬歷二十一年大饑琇輸銀二十兩倡賑知縣郭天璟匾其門曰助義最先

李時馨邑中書舍人萬歷四十六年邊兵乏餉詔諭民間輸助時馨首先輸銀二百兩特敕褒獎

劉 芳邑河間府通判輸銀五十兩助餉兵備道特賜獎薦有曰大人正己赤子存心秋月寒潭三載促車高馬骨衡門泌水幾年野外臥羊裘等語

張 質邑進士任山西臨汾縣知縣以內艱歸里足不履公庭處鄉黨言貌謙抑恂恂如也辛巳十月之變家人皆逃去質曰我爲朝廷臣子在官在鄉義無二也有死而已及城破賊強半皆西人感質德政爭迎以事質惟願速死賊遲回者再不得已

殺之後五日方殮顏色如生事聞於朝贈禮部主事廕一子奉祀從祀忠義祠

王化行邑令雲南河西舉人商舊城卑薄行於崇正九年縮綬茲土時方多難下車卽謀於士大夫欲增修磚城高其雉堞爲守禦計得國學生高思忠傅嘉言董其役建窯造磚出錢募工甫周歲而告成屹然金湯矣其一切費用或出之紳衿之輸助或出之已之俸餘於正供之內外未嘗有所支銷科派也及辛巳闖賊陷城行與思忠嘉言皆仗義而死伏候 題旌

姚文衡直隸貢士崇正十三年來守時盜賊蜂起民不聊生衡政尚寬和令惟嚴明其良民饑寒者不憚多方拯濟盜賊則實於法無赦民賴以少安暇日與諸生課文藝賞口占一律以見志

詩載藝文志 越

明年十月闖賊薄城衡率百姓固守凡三晝夜城將陷衡大書於廳壁曰吾惟一死上以謝朝廷下以謝百姓遂投井死二子亦死之拱候 題旌

張 坦邑庠生天性純孝父早亡與妻金氏事其母克盡子職定省無失辛巳十月之變夫婦俱被賊執坦義氣凜凜挺然不服賊怒殺之至死罵不

口金氏見殺其夫亦罵曰賊奴與爾何仇殺我丈夫情願同死賊又殺之闔縣高其義闔學公舉縣令申上教諭喬時傑捐俸金二兩助其子葬之以上三人從祀忠義祠

國朝

李 玘邑庠生順治十四年 巡撫部院暨巡道憲票積穀備賑玘首先輸穀一百石巡道于朋舉給匾曰俠烈空羣  
王進賢邑人順治十四年輸穀五十石備賑巡道于朋舉匾其門曰義俠空羣

商水縣志

卷之七

十二

以上係舊志

郭天錫邑副榜字簡侯仕至內府中書科中書舍人先是公姿性岐嶷方正好讀書無寒暑孜孜不釋手嘗就學外家外家故宦族載籍極多公喜肆志搜覽經書子史靡不該洽弱冠補博士弟子員居無何流寇至圍其城攻之甚急公度城不能保因與父母夜縋城去路遇賊傷公父公號哭求以身代賊感動棄去公與母扶之歸已而卒公號泣幾絕草草殯葬奉母避難他處時闖賊去來無常人不得耕又大旱蝗人無食食樹皮草子顛沛流離

殆無虛日迨

本朝定鼎始旋里舌耕以奉母中順治戊子科副車會  
邑令高公奉 憲檄纂修邑乘聘公秉其筆公與  
劉子恂傅子雅言郭子爾封雷子鳴魯共編輯成  
書云初授平陽府理刑未之任奉

旨裁革冗職尋改授順天文安縣知縣公蒞任以興利除  
害爲已責勸農桑課耕織民有五袴之歌焉至剛  
正不阿清風兩袖又其天性然也治文九載政績  
卓然未幾以卓異遷內府中書奉

旨諭祭南岳復

商水縣志

卷之七

十三

命後遂以病致仕優游林下幾二十年卒年七十五歲

王 傑邑庠生素行端方然諾不欺辛巳十月闖逆  
破城闔家遇害傑僅以身免叔父承統死於賊傑  
冒矢石尋覓叔父屍葬之領承統二齡子寬同孀  
避難於永寧寨時倉猝逃難背負維艱或恐其爲  
累勸使棄去傑仰天大痛曰吾叔一門祇此一綫  
寧俱死耳忍絕吾叔嗣乎遂攜之行卒得保全無  
害後太平歸鄉里成巨族焉傑亦享耄耋爲鄉飲  
大賓里人稱其盛德至今不衰云

陳王前字陞卿邑歲貢生幼失怙恃孺慕終身年十

二繼母常令掃除牛下前懽然應命衣食不給無  
怨言遇闖逆亂負繼母匿蓬蒿中備極艱辛夜靜  
身自推磴以供母膳不使賊覺賊去母大感動融  
融洩洩無復間然邑中士子從遊甚衆補博士者  
不下五六十人前修邑乘多所改正年六旬舉一  
子人以爲孝行所致

高用式邑庠生幼遭闖寇之變城陷賊迫其父思忠  
入隊思忠故廩監生忠孝性成甘心一死不屑與  
賊伍賊怒殺死北郭外式聞父死委身認屍屍未  
及掩賊復來刀劈式頂血流幾死時將夜半覺有

白衣人食以野瓜方甦迨

國朝定鼎式每遇父忌辰輒悲泣不止終身如一日年  
六旬餘始舉一子岳壽稱人瑞後知縣王夔龍表  
其門焉

劉 恂字羹元邑拔貢生醇謹恬淡好讀書與青州  
從事善不慕仕進遴選別駕三及其門而三辭焉  
甘守窮約輕財好施晏如也惠周里黨遠近咸仰  
其高風三爲鄉飲大賓知縣郭公諱天錦額其門  
曰恩隆壽考

李蘭禧邑國學生年十七遭闖逆焚掠時父病痿禧

負以行遇賊欲兵其父劫使相從禧涕泣哀求願從父死賊中有感泣者因相戒勿殺孝子遂得免後生子五人皆成名以子封奉直大夫

陳方至字澤九王前子邑庠生入太學天性純孝忠厚朴訥有太古風年二十二父歿哀毀骨立幾不欲生殯殮葬祭一一盡禮每遇忌日誕辰輒流涕彌日其素所蓄積然也居常被服布素不尚華飾嘗語人曰先人不幸遭罹禍亂今日太平徒抱風木之悲敢以我之安樂而忘我父之患難乎因泣數行下事祖母李氏色養與人交然諾不欺輕財

好施親族中有吉凶大事輒捐貲助之被其周全者率數十家年踰古稀子孫繩繩成名者踵相接焉咸以爲孝義之報云

李震昇蘭禧子邑監生年十八遭母喪哀毀踰禮鄉人憐之父疾夫婦晝夜侍牀前衣不解帶者三年顛天減算以益親壽撫幼弟坐臥與偕弟時病未痊輒憂戚不食鄉人羣推其孝友有司上其事奉旨從祀孝義祠建坊以示風勵焉

高廷簡用式孫邑庠生早年失怙事母李氏極盡子職祖年八旬祝嘏祝嘏無間晨昏家雖淡泊必竭

盡心力而後已及歿棺槨衣衾無不盡禮事諸父如其父鄉里稱之人無間言

周毓琦邑監生幼恂謹規行矩步不爲畸言飾事人頗異之年十五父歿能盡大事事其母承顏順志以孝聞撫育叔父三世遺孤家業不至失墜里人高其義至今稱頌不衰

李允升邑武生存心端正事繼母有孝行居近沙河每河水泛漲卽自率夫役晝夜堵築近河居民被其保全者甚衆知縣李新猷旌表其門

楊思邁邑武生忠厚傳家五世同居年屆期頤猶如

商水縣志

卷之七

十六

少壯知縣李新猷旌其門曰

聖朝人瑞

李爾蓉邑廩生性友愛僮不羣兄歿與姪湛謀析爨止得空房三間一切園林悉爲湛有未幾湛亦亡幼子弱婦煢煢無倚蓉憐而收之教養一如已子時兄爾錫及湛父子久浮柩未殯蓉爲竭力營葬一一盡禮鄉黨翕然稱其高義 巡撫部院賜匾旌其門曰友於兄弟

王廷誨邑人乾隆六年知縣李新猷匾其門曰孝友

可風

王育賓邑人天性孝友居心長厚急公尚義衆稱其賢

王昌業邑庠生天性淳恬敦行孝弟父作哲病親侍湯藥晝夜不離衣帶不解者數十日每夜祝天以身祈父壽未幾父愈人謂誠孝所感娶增生李率性女好學能文業之孝友皆其內助力也族人以孝義舉於官知縣吳昇命爲本族之長其約束族人率以孝義爲先肅然整齊無一人敢爲非者舉五丈夫子汝震汝霽皆業儒汝霖汝霏汝雯相繼遊泮爲邑名士云

劉人傑邑庠生性仁孝慷慨尚義氣周貧卹孤人多沐其惠澤尤好修補橋路不惜巨費髦而不倦一時有耆英之譽知縣王夔龍表其門曰達尊有二傅雅言邑拔貢生慷慨忠義孝友成性明季辛巳之變流寇屠城二兄同母十餘人俱殉難雅言獨被掠逃回零丁孤苦竭力購棺木殯葬母兄及家人十餘人於先塋存心涉世一以忠厚忍讓爲本壽九十餘歲知縣郭天錦以忠孝匾額旌之至王夔龍又旌其門曰全母慰兄

楊全孝邑人家極貧母年八十餘扶持便溺親滌溺

器污衣三伏日扇枕不懈知縣李興高旌之

陳 炳邑廩生孝自性成學有本源十歲失怙事母  
曲盡其孝家極貧無以給朝夕母常鬱鬱遂至喪  
明炳備極孺慕飲食必豐不使其艱難有負米  
懷橘之風從堂叔王前學得鵞湖鹿洞正派雖極  
寒盛暑吟誦不輟邑里稱爲理學先生

郭玉瑛字華崑邑人忠厚端方天性孝友生母早逝  
事繼母馬氏盡禮承顏怡志能得其歡心與兄玉  
珰相友愛兄家貧不能自給爲置產以贍之及歿  
號泣累日殯葬無失禮焉冢君際辛克振家聲早

列膠庠得謂非忠厚之報歟

陳 坤邑人剛方正直重然諾尚義氣事父母先意  
承顏曲盡子道繼母邢氏性嚴厲事之維謹雖以  
難事責之亦悅從無違母病奉事湯藥晝夜不離  
左右母大感動撫之若已出焉親族有吉凶大事  
輒傾囊助之不啻麥舟之贈年四十舉一子天之  
報施蓋不爽云

王天成邑人天性孝友事父母色養兄弟族人  
有吉凶大事及貧乏者輒周卹之不責其償樂善好施  
人頌惠愷內助王氏亦如之年近八旬皆矍鑠如

少壯子毓全克承厥志蜚聲譽序洵孝友之報云  
支含文邑人忠厚醇謹有太古風善事椿萱家道寒  
素手口拮据不遺父母憂雖體無完衣而親常極  
豐煖及歿號泣盡哀觀者爲之流涕親族子弟有  
忝子職者率以天性感之詩曰孝子不匱永錫爾  
類斯人有焉

李 銘邑監生候選州同知性倜儻輕財好施弟錦  
有同心焉周口西偏河堤薄削每河水暴漲堤外  
盡屬波濤蟻穴汪洋無計堵塞幾至衝決銘慨捐  
膏壤五十餘畝挹彼注茲始得保全無害一危於

康熙五十七年而知縣黃公築之再危於雍正元  
年而知縣吳公築之全活一市生靈微夫人之力  
不及此宜市人至今誦德不衰云

王文質邑人忠厚慈祥好周人急難尤篤倫族有從  
堂弟文瑞文祥幼失怙恃無依歸質憐之收養家  
中爲娶妻生子未幾瑞早逝遺孤育寧甫三齡質  
撫若己子授之室使興家立業焉族兄王順家貧  
寄居他鄉父母死不能葬骨骸暴露質召之還爲  
營葬具又里中有楊姓張姓者母死貧無以葬悉  
與棺木且捐地以葬之其周人急難如此

李化龍邑人字羽天候選經歷天性孝友重然諾尚義氣好周人急難親族鄉里多沐其德惠橋梁廟宇有頽圯者輒捐貲倡修樂善好施年垂八十猶孜孜不輟焉

李率性邑庠生字含真慷慨尚義氣尤篤一本之愛明季賦稅煩重族人迫于追呼競以契投公鬻田爲納稅計公憫其艱苦爲周全之事已公乃悉召鬻田者焚其券以原產與之衆堅辭不受公曰予豈圖若產爲若輸稅保業耳數年足矣忍復累我子孫耶衆感泣受田而去佃人掘地得金同事以

告之公曰土中物我何有焉置不問好讀書雖罹兵荒未嘗釋卷人或以書癖嘲之者公不顧呶唔自若

國初補增廣生從遊者甚衆子公晉邑庠生公猷領歲薦子孫書香綿綿不絕皆其義方之訓衍慶後嗣云

支元生邑人有特姿識大義年十歲親老兄嫂相繼而歿遺二姪俱幼生上事椿萱下撫弱姪手口拮据三十餘年門內雍雍無詬誶聲次姪方卜列名膠庠能振先聲非元生義方之訓不至此

李 振字伯成候選州同知明中書公曾孫爲人忠厚謙謹磊落仗義邑人咸推重焉康熙四十八年河伯肆虐麥秋俱沒四十九年春十室九空人食樹皮草根流離逃散者十有八九公捐雜糧四百餘石賑卹之周口市民及親族沐其惠者數百家一時翕然頌其遺愛開封府丞王公匾其門曰博愛可風

李文先邑人家貧好善專以利人濟物爲心橋梁廟宇有頽圯者輒募化以修葺之常科頭跣足雖盛暑嚴寒不知其苦又化導同心邑人王曰武等共

成善果俗謂之李善人

段 維邑人家貧好善處庭闈以孝聞伯叔三人皆乏嗣維盡猶子之職養生送死俱能無媿至其心存利濟與李善人同如修葺城隍玄帝等廟及黃家冲龍塘河等石橋維有力焉亦善行之可風歟

李爾銓字伯遴邑庠生天性孝友存心正直兄弟雍睦有華萼風田宅佳者推讓兄侄自甘窮約家貧好義族中有貧者慨然周卹之捐修趙集河堤一市之人咸賴以安善岐黃精醫理施方藥救濟貧窮不索藥資雅尚陰隲崇信袁了凡功過格每手

錄數本勸諭同人王文等共遵行之其與人爲善如此

王 文字華國邑庠生慷慨尚氣節善詞說與人排難解紛不避物議里人有鬻女者捐貲贖之令與本夫完聚又贖楊姓之妻俾爲良人其仗義大率類此云

李大基字篤生邑人忠厚醇謹重義輕財與兄大魁友愛田產均分外有美庄一處推讓於兄絕無競心嘗充膺牌頭有花戶郝姓者拖欠四年糧銀貧不能納基捐貲代納之子紹棟邑庠生孫凌漢大

學生奕葉繩繩克承先志積德昌後豈虛語哉

陳 琯字獻白邑監生性孝友慷慨樂施事繼母以孝稱撫孤侄若已子里人有負債者貧不能償取其券焚之每遇歲荒年終查其窮乏者一一周卹之率以爲常施義地捐棺木又其善行之卓卓者知縣李新猷表其門曰孝友樂施

趙仕賢字俊宇邑處士幼英敏有武畧明末兵燹之際禦難有方閭里親族被其保全者甚衆

本朝定鼎隱居不仕好行其德享年九旬德延後嗣子孫並列膠庠世澤綿綿書香不絕公之餘慶方未

艾云

徐 珠邑人忠厚醇良好善樂施修朱洪橋以便行  
旅捐施棺木掩埋枯骨遇乞丐則贍給之其慷慨  
樂施類如此

彰善坊

附

王廣運字介庵邑增生性耿介動循禮法慷慨周人  
急難與人交然諾不侵尤以成就後學爲己任遇  
親族子弟輒諄諄以力行勤學相勸勉人多率從  
之其與人爲善類如此云

李震興邑監生乾隆四年捐給貧民麥種一百石又

商水縣志

卷之七

二十一

捐入義學銀五十兩

李 郊邑監生同姪樹勳乾隆四年捐給貧民麥種  
一百石又捐入義學銀五十兩

康一彥邑庠生康翰子也出繼長門其本生父年老  
弟蕩產失業無以養瞻彥舉所得長門產業以半  
與弟以養其親人高其義

趙全信邑庠生全敬之弟從兄弟同居家人計百口  
信秉公總理家計使士農工商各職一業一門融  
睦絕無齟齬時人難之

張 佩邑人弟早歿遺子萬年甫兩月佩撫之如已

子俟其成乃授之室尋入泮焉

時 珣邑人少失怙恃事後母李氏極孝友愛後母弟始終不替人爲之咏鵲鴿云

左國榮邑人有濟人利物之心善募化修補橋路沙家埠口固墻石橋皆其力也

陳光榮邑人善事後母友愛諸弟旣析爨父母之喪皆獨任之弟亦感泣敬其兄至老不衰

李永吉邑人三歲父歿母王氏撫育成人家雖貧供母必甘旨無或缺焉與伯析產遵母取其瘠者及伯子貧常周卹之人以爲難得

李廉襄邑庠生睦族濟貧鄉鄰有婚葬而力不給者輒捐貲助之又捐入廣惠堂五十兩以養貧民  
王光智邑人好善積德修補橋路掩埋暴骨鄉里稱之曰王善人

黃 柚邑監生孝友堪式利濟無窮

王恭儉邑人友愛諸弟有花萼風樓房良產悉讓於弟自擇薄田五十畝勤儉致富親歿喪具皆獨任之不派累其弟年荒弟典當田地以給朝夕儉以已財贖回與之

劉文炳邑人父早逝事母曲盡孝道母病晝夜侍牀

前湯藥必親嘗以進每夜祝天祈以身代母尋愈  
有三弟俱未娶炳出已財爲之婚娶弟有室卽求  
析爨炳奉母獨居未幾弟婦相繼俱歿炳復招與  
同居又爲之授室焉其孝友如此

楊襲慶邑廩生五世同居孝友兼盡好濟貧沐其惠  
者甚夥又捐地八畝掩埋遺骸事聞 撫憲檄贈  
士林矜式匾額以旌之

顧多見邑人性淳厚守分不預外事孝友其天性也  
父母病晝夜憂思寢食俱廢及歿哀痛盡禮六載  
不與晏會有姊已嫁家貧不能自存見招與同居

分糧而食之又爲二甥婚娶知縣李新猷旌之曰  
孝思不匱多見卒一子尚幼官斷過姪顧堯臣爲  
子育孤養老送死皆得其人矣斯亦爲善之報歟  
錢 仁長蘆商人修廣惠堂輸銀百金乾隆七年又  
捐麥種五十石 巡撫部院旌之曰不私其利併  
入彰善坊以示風勵

方技

自古醫卜星相之徒類皆以術自鳴於世如盧緩  
之脉理管郭之占驗虛中一行之推步叔服子卿  
之風鑒蓋皆卓卓者夫苟有其道皆有可觀雖崇

儒重道者不無取焉豈可以爲小術而擯棄之乎  
商舊志不列方技蓋難其人耳然竟缺焉不載亦  
未免不備之憾姑列一二以俟繼起者何不可哉

國朝

李立本字起生邑人生於明季隱居不仕托業於醫  
窺岐黃之奧生死天壽一見而決不爽毫髮一時  
以神醫目之華邑王都憲夫人病其子方在史館  
乃延太醫院名醫二人至其家調治兩月不愈及  
公至一藥而痊衆乃拜服時有酒徒某見公名重  
不服伸一手以試公曰爲我診之公診視良久大

商水縣志

卷之七

二十五

驚曰腎脈已絕可速歸其人行未數武仆地而亡  
一日在胡某家座中有張姓者曰君素稱神醫看  
我有病否因請診公診之曰君病可危當在二年  
後驗然尚可醫因與之方囑令必服其人腹誹竟  
置之後二年公復至胡氏家胡命邀張爲導飲公  
訝之曰張君尚在乎此其時矣胡使至張方仰臥  
聞公至甚喜急起纔着一靴而氣已絕其神異類  
此

王廣運字芥庵邑庠增生精岐黃術有求醫者雖嚴  
寒盛暑不辭勞瘁必期病痊而後已人或以微物

相酬謝輒厲色拒之至貧不能醫者則施之以藥  
雖金石不求值焉里中有柴姓者無子惟一女最  
鍾愛忽得危症延視之曰此證九死一生度爾家  
貧無力服藥卽服藥亦罔濟耳柴夫婦驚怛痛哭  
跪伏不已運感動自出藥醫之一日兩至其家診  
視隨症易方調理兩月計所服藥約值五十金竟  
得大愈其人感激懽呼計無以報令其女拜公爲  
父時往來其家若戚誼焉又楚人李某攜貲冒易  
中州失其資本落魄不能歸抑鬱憤懣遂成癱症  
伏地匍匐而行不能起立乞食至公門詢其所以

憐之因胗其脈曰此症尚可醫何得遂成廢疾遂  
留至其家與之衣食投之以藥輒効未幾能稍稍  
自立又月餘行步健履如無病時其人大感泣叩  
頭不已公因勸之歸贈盤費而去其他神妙不可  
殫述所著有十二經絡針灸秘法及註解仲景傷  
寒論於斯道殆得其三昧云

王夢桃字介眉邑監生少聰穎孝友純篤家庭雍睦  
倜儻灑落不爲俗情所羈精琴棋善書畫有小齋  
日夕坐卧其中尋道子山陰之奧客至則手談一  
局不計勝負去則閉戶獨酌或時理絲桐以自娛

焉知縣李新猷匾其齋曰雅致怡情

節烈 賢孝附

天地位而乾坤定陰陽別而男女出道固備於鬚  
眉亦不遺於巾幗者也昔劉向傳列女而節義居  
一誠以是爲閨閫之所首重而孝與義輔以行之  
而坤道以全彼殉難者宜崇以祀典而堅貞者亦  
與以褒獎其有未與於

朝典者竟聽其沒沒於幽潛而已乎噫孤燈素壁傷心  
黃鵠之詩午漏清霜淚盡烏鵲之句烏得不備志  
之以揚彤管之休作香閨之則與

商水縣志

卷之七

二十七

前代無考

明

趙 襄女許嫁李姓而未適其夫病卒女聞號泣越

三日自縊死事聞於朝勅賜列女坊以旌之 從祀節烈祠

祠

贈中書舍人李珠妻王氏珠早卒氏封髮自誓勤績

紡以詩禮訓子垂三十年子時馨由國學任中書

舍人受誥封乃卒聞於朝勅建貞節坊 從祀節烈祠

郭璉妻杜氏璉病卒氏守節二十年號完璧知縣楊

一廉旌其門曰栢舟高節 從祀節烈祠

王大妻祁氏大病故氏痛泣曰吾何天乎孰若死之  
爲快乎自縊夫屍傍宗人憐之合葬焉上其事給

匾以旌其門

從祀節  
烈祠

國學生傅商佐妻惠氏佐卒氏撫三子教以義方垂

二十年長子嘉言遊國學三子雅言拔貢知縣裴

鉉楊一廉相繼贈貞節匾額以旌焉

從祀節  
烈祠

張一平妻紀氏平卒氏年二十守志無玷知縣黎壯

圖賜匾曰貞節可風

從祀節  
烈祠

李時蘭妻高氏蘭病氏侍湯藥晝夜不懈後漸危乃

囑氏曰我死汝須勉守無忘吾夫婦恩也氏哭語

商水縣志

卷之七

二十八

曰但當養病無慮後事脫有不虞我當侍爾於地

下語間而蘭氣絕矣氏潛入隱室自縊死蘭復甦

聞氏死流涕曰等我與爾同行須臾亦死通學生

員高其義具呈本縣知縣郭天璟匾其門

從祀節  
烈祠

孝廉王風淳之妻黃氏淳任棲霞母年九旬留氏奉

侍寢膳之事必親與焉僕妾雖多未嘗少假也及

闖賊陷城扶其姑藏於宅後僻處賊搜得捶斃氏

枕股哭賊將逼之氏大罵曰吾宦家婦豈受汝賊

奴辱乎速殺我賊乃殺之御史陳潛夫聞其事於

朝賜匾曰節孝齊芳

從祀節  
烈祠

以上係舊志

邑人鄭永春妻王氏春病故子方閱月氏勤績紡以糊口艱苦備嘗卒能成立其子壽至七十餘歲而卒朝廷賜匾旌獎

史氏年十五許聘胥山盧爲妻未嫁而山盧卒氏聞訃願往成服父母不許氏泣曰烈女不更二夫何禁一弔乃許之偕至其家氏撫棺痛哭絕而復甦者再旋執婦禮朝夕哭奠旣葬父母促其歸氏曰此吾家也又安歸夫不幸早故翁姑垂老衣食安寄願留此終養不願入他人室也父母不奪其志

遂聽之氏乃執婦道晝夜績紡易粟以供二親及歿喪具皆自爲經紀壽至九十餘而卒

邑人趙養才妻王氏年十七適養才以病故氏悲痛期與同死是夕果投繯焉敕賜建坊以旌之趙四姐邑人趙湘女許嫁鄧氏兒後湘攜女入京城衙門供事鄧兒在家病故女聞訃哀痛哽噎遂自盡於母室中事聞於朝詔給銀優恤其家仍賜建坊旌表

國朝

邑諸生王承統妻毛氏先是崇禎辛巳十月闖寇破

城闔邑殲焉統與子僕同日死難氏率幼子寬流離患難艱苦萬狀茹荼况瘁日不聊生每共人語則泫然流涕曰未亡人所以不死者徒以藐孤在也植節育孤備歷諸艱五十餘年卒能保有先緒遺孤成名壽至八十七而卒知縣郭天錦旌其門曰節壽齊芳

邑人郭宗聖妻賀氏適郭宗聖未久夫歿家貧不能自存翁姑曰爾夫早喪無子吾老矣恐無以饋汝不如早事他人氏泣曰夫亡二親何依願終養代夫送終翁姑感泣氏紡績掇薪以供二親未幾翁

先棄世其姑復勸之如前氏志愈堅始終不變其節知縣邵瑗旌其門曰節孝流芳

邑人孫益盛妻馬氏明末辛巳十月之變橫屍遍野盛亦殉焉氏委身認屍哭覓三日得之衆死骸中斂而葬之誓欲同死有子彌月恐絕夫嗣撫之以俟其成越二十年其子立補邑庠生語云死易保孤難氏蓋爲其難者也享年八十九而卒

邑人顧斗二妻劉氏幼適斗二甫二載二病故氏栢舟自矢誓不他適無何舅欲奪其志氏號泣數日度不能拒乘間自縊於夫墓前樹端行道見之莫

不爲之太息知縣吳謐表其門曰矢志靡他

邑人王楷妻李氏幼適楷家貧如洗氏處之晏然楷患癘疾大漸氏解當充藥餌不愈已而卽世別無強近功期氏親爲營葬事畢從容誓於夫墓曰有死無二七日而引帶自盡知縣邵瑗旌其門曰

崇獎幽貞

邑庠生高翔妻張氏年十六適翔閱二載翔以病故遺一子甫週歲伶仃孤苦無所依靠氏躬親績紡苦志守節三十餘年教子讀書丙夜篝燈無間寒暑子迪能遵母訓學成補邑博士弟子員知縣邵

瑗表其門曰節毓雙徽

邑監生陳方至妻劉氏幼嫻內則持身端重寡言笑甫十齡事母克盡職十五賦桃夭雅執婦道外言不入閨門之內肅睦凜然人以爲有柳氏風事舅姑寢膳必親視不委僕婢姑卧病甚篤氏衣不解帶藥必親嘗籲天求代三十晝夜未嘗少懈未幾姑歿氏痛幾死朝夕供奉如生時庶姑蔣氏患癰症氏事之如姑十五年間不暫離蔣感泣語人曰願新婦子若孫亦如新婦孝敬康熙四十七年春氏病且劇猶急呼曰殯我姑願從事於地下也遂

氣絕越明辰家人及比鄰聞空中鐘鼓聲有人語曰劉氏事姑孝上帝嘉之延壽十七載須臾氏甦所言與家人同後果十七年而卒鄉人咸驚異稱其純孝知縣吳耀題其柩曰婦德常昭羣說闔閭未遠姆儀何在應歎孝婦云亡

邑處士王恭已妻郭氏內府中書天錫公女也年十八於歸恭已恭已故明官裔經兵燹之後家業蕩然氏雖出名門而謙謹自持雅執婦道絕無富貴驕人之態親操井臼善事舅姑荆布蔬食晏如也性嚴整教子義方無少姑息雖扼於時命功名未

就而忠厚醇謹亦自無忝家聲長孫伯學名振膠庠食餼天家蔚爲一邑之宗非氏之力不及此以故賢孝之聲喧於閭里壺德堪式伏候旌表

邑監生李又沆妻李氏生三子樹德樹勳樹言康熙五十四年沆以病卒氏年二十六上事翁姑下撫孤子備歷艱辛垂三十二年三子乃俱成立樹德娶朱氏甫一載而歿朱年十八誓操栢舟不更姓過樹勳子爲嗣兩世孀居苦節堪憐事聞 部院給匾旌獎

邑監生趙廷琦妻傅氏年十八于歸生二子未幾夫

以病歿氏卽號泣不欲生念老弱無依不得已剪髮自誓凜若冰霜孝事孀姑慈撫孤子艱辛不可名狀姑得痰疾時昏憤氏朝夕在側衣食必親爲侍奉不離左右十餘年如一日清操苦節教子義方長子昺已補博士弟子員次子景業儒衆咸謂貞烈之報云

邑監生李紫袍妻王氏年十七適李氏生二子長登科次登殿夫歿氏以未亡人上事垂白之姑下撫呱呱之兒績蓼茹荼垂三十餘年里人咸服其節操合學公舉奉

旨建坊旌表

李紫袍胞弟紫衣妻雷氏年十七于歸甫二載夫故無嗣以死自誓嫂王氏憐之以次子登殿爲之嗣氏感激泣下節操愈勵與嫂共守清苦閨門之內肅若朝廷奉

旨並建坊旌表

邑貢生誥封奉直大夫李震普妻陳氏少貞靜閑雅不減林下風致年十九于歸震普克篤婦道治家嚴明內政肅然有條事姑舅以孝聞諸子則以義方訓之雖夙號素封而被服布素晝夜績紡不輟

其勤於女紅如此繼姑魯氏病篤氏朝夕侍奉體恤周至歿則盡哀盡禮允足以當大事至其處妯娌數十年始終無一閒言尤人所難能者以夫封宜人知縣李新猷表其門曰賢孝可風

邑監生陳增妻高氏幼嫻女則長適增善事舅姑曲盡婦道姑有命或責罰未嘗不欣然承受姑臥病幾危暗嘗其糞以占病機其味轉甜氏乃號泣籲天願以身代姑病尋愈未幾舅姑相繼卽世兩當大事佐其夫盡哀盡禮不至遺恨終天者氏之力也有僕女翟氏父母俱亡氏養如己女爲擇壻嫁

之婦德婉婉殊有孟陶之風舉四丈夫子長大琰成太學四大琳幼遊泮二三大玠大受皆業儒論者謂人道無虧生順歿寧云

邑儒童郭逢辰妻王氏年十七歸逢辰生子定甫數歲夫故氏年二十五矢志靡他苦節自勵孝事翁姑養生送死一一各盡其道翁遺幼子三人氏皆撫育之使成立各授室焉家計之暇則晝荻訓子慈嚴兼至卒能成就其子爲成均佳士云

邑人楊大德妻時氏夫故堅志守節義方教子三人皆成立 學院張表其門曰美並梁媛

邑人王其淵祖母程氏年二十一夫歿誓守堅貞至八十一歲而卒 學院張旌之曰苦操勵世

邑人李如輅妻耿氏夫故志凜冰霜誓不二天清操垂四十年 學院林給匾旌獎曰志完貞素

邑人段行健妻王氏行健祖應遴父廷臣俱蚤逝祖母李氏母李氏妻王氏皆少年守義至行健歿而嗣竟絕收養族人子爲嗣三世相繼共矢栢舟知縣王夔龍旌其門曰三世冰操

邑人李化龍妻張氏夫歿氏方二十歲堅志守節五十餘年知縣王夔龍旌其門曰節孝可風

商水縣志

卷之七

三十五

邑人李承嗣妻于氏夫故氏年二十六家貧勤績紡訓子成家知縣王夔龍贈匾曰冰雪其操

邑人馮慶隆妻黃氏夫故氏年二十一堅志守貞遺一子教使成立苦節四十餘年足爲彤管生輝

邑人蕭聖瑞妻史氏夫歿卽自縊死

邑人王奮庸妻劉氏氏年十九夫歿有遺腹子撫之績紡度日苦節三十八年 學院張旌之曰操凜

冰霜

邑人王錫兆妻趙氏夫歿五日氏自縊死 學院張旌之曰烈志維風

邑人王積妻李氏于歸甫週歲生一子夫歿撫之成立娶媳張氏未幾亦病故李痛媳張亦悲姑煢煢相依垂四十年 學院採訪旌之曰姑媳同貞  
邑人李大璞妻安氏夫歿誓操栢舟志凜冰霜里人高其節義乾隆三年奉旨建坊以旌之

邑人李庠妻胡氏夫歿氏年二十歲割股奉姑沉疴頓愈和丸教子振起先聲 學院張給匾旌之曰節孝可風

商水縣志

卷之七

三十六

其門曰節孝雙高

邑人高廷爵妻李氏夫故氏方二十歲一子早歿氏堅貞不易撫幼叔廷祿日夜績紡勤儉持家艱辛備嘗冰操愈凜今已七旬有餘志之以爲金閨之矜式焉

邑人黃致中妻高氏夫故氏卽自縊爲嫂所救得不死因勸慰至再且許以子過繼氏乃拜謝與其堂嫂興中妻張氏共矢栢舟 學憲張旌其門曰雙操並勵

邑人王柱妻楊氏知縣王夔龍匾其門曰風紹栢舟

邑人李爾殿妻魏氏夫歿苦節五十二年

邑人李謙妻石氏守志三十五年 學憲林旌其門

曰玉質聯輝

邑儒士王永壽妻魏氏夫故氏年二十八歲無嗣有

三女過繼兄子伯行爲嗣孝事翁姑和睦妯娌茹

藥飲冰晝夜績紡苦節三十餘年現年六十三歲

邑人李興龍妻徐氏于歸甫七月而夫病故氏年十

八守孝服闋家人諭以換孝從吉氏不應閉戶沐

浴更衣自縊死知縣李新猷贈匾曰舍生取義

邑人羅鳳妻王氏年二十夫死三日自縊死知縣李

商水縣志

卷之七

三十七

興高表其門曰節烈可嘉

邑人李灼妻黃氏幼年苦節堅貞自矢孝慈無虧終

始不渝知縣王夔龍匾其門曰節媿松筠

邑人李守業妻張氏夫故年十九守節五十年而卒

知縣牟繩祖旌其門曰節孝可風

邑人翟民祝妻焦氏年十九夫故尋生遺腹子撫之

成立事舅姑以孝謹稱知縣王夔龍旌以匾曰節

苦孝隆

邑人郭學仁妻張氏年二十二夫死無子苦志守節

垂四十年知縣王夔龍贈匾曰志矢兩髦

邑人魏登庸妻高氏夫故氏年二十六無子過兄子  
爲嗣貞心自矢凜若冰霜守節四十年現年六十  
六歲知縣王夔龍旌之曰節孝兼篤

邑人趙寅妻張氏夫故氏二十一歲無子

寅弟趙仁妻康氏夫死氏年十九歲無子共撫幼叔  
天性天化二人各過一子與二嫂爲嗣冰操苦節  
三十餘年知縣李新猷贈匾曰雙節全桃

邑庠生雷霖妻李氏青年失偶冰霜自矢孝慈兼備  
人無間言

邑人王全倫妻王氏倫死氏年十九家赤貧無所養

瞻苦志守節三十餘年此潛德不可沒也

邑人顧四木妻王氏年十七于歸四閱月夫病故三  
年服闋家人議立嗣氏不發一言入室自縊死知  
縣李新猷旌其門曰節烈可風

邑監生陳文成妻傅氏年十九于歸陳氏端凝恬退  
治家有法事上接下各盡其道閨門之內肅如也  
未幾夫亡氏年二十卽欲自盡以遺子兼善甫兩  
月勉強守義俟其成立冰操自勵五十餘年現年  
七十八歲松筠之節衆共稱之

邑監生李震旺妻王氏年十七適震旺事姑克盡婦

道及旺歿氏痛哭絕而復甦者數次以死自誓姑諭以大義乃矢志守節捐棄華飾布素自安撫育三歲姪孫秉仁如己出歷三十年如一日人稱其節孝

邑人李堦妻柴氏節孝素著 學憲張給匾曰節孝可風

邑人李龍光妻黃氏年二十適龍光越四載夫故無嗣氏苦志守節奉侍翁姑克盡孝道翁姑歿力辦喪具務必從厚撫弟子成珂爲嗣清操三十八年矣

邑人張曰梅妻李氏事繼姑劉氏以孝謹稱劉臥病甚劇氏焚香祝天願以身代復割股以進劉尋病愈鄉里稱其純孝

邑人王之炳妻趙氏年十八適之炳甫一載生子僅八日而之炳歿時翁姑年已垂老氏下撫遺孤上奉二親手口拮据艱辛備嘗翁姑俱終壽考子亦卓立成名皆氏力也守節五十一年現年六十有九知縣王夔龍匾其門以旌之

邑墾官莊鼎妻高氏乾隆三年知縣李新猷給匾旌其節壽

邑監生李定世妻顧氏夫早亡遺子二齡名恭氏撫之成立娶媳史氏生一子恭又歿時祖翁祖姑暨姑之靈皆浮柩未葬史氏率八歲子舉竭力營辦葬之無失禮鄉里稱共兩世節孝

邑監生李震昇妻王氏適震昇年十六卽克主持中饋井然有條姑鄧氏患癱症不能起氏竭力奉侍無間晨昏及歿絕無惰容夫弟震旺震普俱幼氏撫養成立繼姑魯氏病氏親嘗湯藥晝夜不懈賢孝之聲洋溢里巷

邑人李國顯妻李氏國顯出外鄰人陳黑妮攜刀入室欲污之氏死拒不從被殺雍正四年 旌表從祀節烈祠

商水縣志

卷之七

四十

邑監生陳兼優之僕單從禮妻張氏兼優傭工劉盛全窺氏少艾乘從禮輪守大門入室求姦氏咬傷盛全得釋氣忿自縊雍正九年墓前建坊 旌表

邑人婁琚之女婁二姐年十二有姿容同居族叔婁灼乘琚夫婦他出白晝入室欲行姦污二姐喊叫婁灼用手狠搯二姐咽喉立死雍正十一年 旌表從祀節孝祠

邑人張運極妻文氏夫故氏方少艾苦志守節四十

八年鄉黨稱之

邑監生李興妻陳氏年十七于歸素嫻內則克盡婦道事姑以孝聞姑歿事庶姑夏氏如嫡姑謙德和氣坤儀堪式內外稱之率無間言

邑人孫大觀妻吳氏年十九夫故四門胞侄冲未僅三月氏遵翁姑命抱養之愛惜如己出及成立爲邑諸生食廩餼氏年五十以病歿

邑人孫方妻張氏年十七于歸孫氏閱五月而方歿氏誓不二天孝事翁姑過二門侄元昌爲嗣晝荻教之元昌亦自奮將來成就不可量云

商水縣志

卷之七

四十一

邑人王應戌妻王氏戌早歿無子氏堅不改節弟應科止一子學文王氏養以爲嗣知縣牟繩祖旌之曰勁節芳儀未幾應科又卒妻張氏亦以栢舟自矢遂以學文奉兩門祀均不絕焉

邑處士王朝陽妻李氏朝陽年二十以疾歿氏方十九歲守節不再醮織紡度日事翁姑克盡婦道養生送死無少缺禮過繼族子以延先嗣松栢之操洵堪不朽

邑儒士王庶常妻趙氏年十八夫歿矢志兩髦清操自勵歷三十一年內外稱其節義無間言云

邑庠生趙之魁妻石氏魁幼病癘症氏事翁姑惟謹  
翁患癱疾氏親滌溺器湯藥飲饌必親奉翁性暴  
少遲卽杖擊之氏亦跪受無怨言閱八年以勞憊  
病血猶不自恤每夜焚香祝天願減壽代親未幾  
姑亦患癱復顛天自誓願衣單食素三年不理髮  
不爐火以祈佑姑病及翁姑歿兩營葬事皆竭盡  
心力無稍遺憾又嘗施粥三年以濟孤貧親族中  
有無力婚葬者輒捐貲助之純孝淑德允堪儀型  
閨閫伏俟旌表

趙之魁次子長松之妻李氏年十七適長松越五年

而夫故無嗣父母欲改嫁之氏號泣不從以死自  
誓先是石氏執婦道時氏爲孫婦凡其姑之孝行  
艱苦久已動其天性故其事石氏純孝亦如石氏  
焉卒年八十有四

邑人李名元妻胡氏年二十二歲夫歿勵志守節清  
操三十年至五十二歲卒

邑儒士賈麟福妻王氏于歸二年夫故氏卽欲自縊  
祖姑姚氏指腹諭以爲夫存祀氏乃剪髮自誓已  
而生一子未週歲而歿祖姑度其必欲自盡勸令  
歸寧俾其母慰解之氏歸七日誑以歸省祖姑遂

還至家三日歡笑如常時祖姑防稍懈氏潛入室  
衣粧自縊比祖姑覺已氣絕矣死二日方斂顏色  
如生知縣王夔龍旌其門曰不媿所天

邑人劉國儒妻谷氏年十八適國儒雞鳴戒旦相夫  
如賓事翁姑克盡婦道甫二年夫病氏輾轉牀榻  
晝夜不離未幾病垂危語婦曰我死爾能從我地  
下乎氏拭淚言曰汝寬心養病勿爲我慮汝死我  
當偕往及夫歿號泣不止是日晚入室自縊聞者  
莫不感歎

邑儒士李定元妻王氏于歸三年夫歿無嗣氏乃冰

操自勵奉養舅姑孝心誠篤無間晨昏姑憐之以  
長門三子長周爲嗣由是志節益堅績紡度日和  
丸教子書聲與機聲相間節孝並美允堪儀型閨  
闈伏俟旌表

邑監生陳兼行妻張氏于歸二年夫故後一月生子  
發科氏乃冰操自誓紡績爲業終身不華飾迄今  
二十餘載終無二志伏俟褒獎

李一韓繼妻婁氏其前妻遺子爾錫婁氏撫若己出  
訓以耕讀父亡爾錫恪遵母訓教其弟爾銓爾蓉  
並孫湛俱入邑庠苦節五十餘年知縣胡樓生匾

以旌之

邑人胡璞妻王氏年二十六夫故守節五十五年以壽終知縣王夔龍旌其門曰閩內義方

邑人黨三戒妻謝氏年二十五夫亡守節五十三年孫婦舒氏黨五桂妻夫歿卽自縊死知縣王夔龍旌之曰兩世清操

邑人李又白妻許氏年二十二歲夫歿貞節自守矢志靡他孝事孀姑三十餘年無懈志家人咸歎服之

邑人劉漢復妻李氏年二十五夫卒無嗣葬畢卽欲

自縊一老媪勸之曰爾夫早死已爲不孝不思代夫孝親尚欲以死傷舅姑之心乎氏大感悟遂不死過其侄茆爲嗣娶崔氏家貧晝夜紡績養舅姑終其身氏病崔氏割肉以啖其姑姑尋愈人以爲苦節苦孝云

邑人黨積德妻史氏年二十一德卒止一女決意自守誓不再醮事翁姑溫清定省未嘗少間又迎其母與姑並事以慰母心又能友妯娌三十餘年並無間言允足爲閩閩所矜式矣

邑人胡潤道之妻午氏年十五歸潤道二十四歲而

道卒生一子早歿氏乃矢志守節孝事翁姑一市之人皆稱其賢

邑人孫克明妻朱氏年二十五夫歿氏遵夫言貞節自持上事翁姑下撫諸弟家庭之間晏如也未幾翁姑俱逝諸弟亦亡及祖翁祖姑之喪並停中堂氏乃勤儉自勵卜地擇吉一日之間七棺俱葬氏亦偉矣哉伏俟旌表

邑人馮君重妻賈氏十九歸馮溫柔恂謹家人皆悅之姑獨不喜凡事以難者責之氏應命無違一日姑小恙氏殷勤問飲食不答又問姑怒曰欲食爾

肉氏退卽割右股爲羹以進姑食之越二日其祖翁見氏隻手而舂怪問之氏佯曰瘡也祖翁疑之使其祖姑解視之乃刀痕也問其故答曰姑病以食吾姑耳祖翁大怒切責其翁姑聞而愈銜之凌爍倍甚氏抑鬱踰年自縊死至今言及猶有爲之流涕者

邑監生郭啓是妻李氏年二十六是歿撫二子守節二十餘年永無他意松筠之操經霜愈堅伏俟旌表

邑庠生郭寬妻趙氏寬性聰敏好讀書以父失明而

諸弟幼遂廢學及氏歸寬力勸之學願代寬奉親寬遂從師受業三年遊泮宮時年二十五止生一女而寬病且篤語氏曰雙親幼弟以及弱息悉以累吾子恐子不能終其操也柰何氏泣曰願保重無慮此卽有不虞務必終君之事乃從君於地下耳寬卒氏剪髮自誓更無他志事翁姑撫諸弟較昔尤篤翁姑歿率諸弟以禮殯葬諸弟成立各爲授室於是氏乃獨居紡績以待女之成立

邑人盧大受妻朱氏年二十六夫故一女方三歲氏安靜自守服闋父母欲奪其志氏曰天一而已豈

可二乎吾不爲也歸室斷其髮以絕物議過長門第三子鞠爲嗣生二孫而氏病家人勸其服藥氏曰吾所以不死者以吾夫無後也今有子有孫吾事已畢尚服藥何爲越數日而卒

邑人李爾勲之母馬氏年十八歲夫亡矢志守節撫養遺孤苦節五十餘年享年八十二歲卒知縣牟

繩祖旌表

邑儒童郭啓後妻李氏後幼好學能文章年二十二以弱疾病故遺一子鈺時方襁褓氏仰天號泣幾不欲生以子故未忍割棄乃清節自矢撫育藐孤

事繼姑鄧氏曲盡婦道苦志二十載鈺始成立娶  
媳李氏未二年鈺亦尋歿氏乃撫膺痛哭曰向所  
以不死者徒以藐孤在也今無望矣何以生爲其  
媳泣慰之曰姑死翁嗣遂絕矣死事小存嗣事大  
姑且索一子爲嗣媳願奉姑終身義無他適願姑  
自愛無徒苦也因相持大慟族人憐之使繼啓是  
次子鑑爲嗣煢煢姑媳相依爲命績麻茹荼冰操  
愈勵一門雙節允堪作式巾幗伏俟旌表

邑人單愍妻屈氏愍家貧不能娶氏年二十餘乃歸  
愍閱四月夫亡歲荒無以糊口氏乃集蓼茹荼手

口拮据孝養翁姑歷三載服闋姑憐其幼欲嫁之  
囑命者使探其志氏厲聲曰我志決矣命何能爲  
遂剪髮示無二心翁姑爲感泣命養其姪水泰爲  
嗣以終其志焉

邑儒童朱緒倫妻郭氏年十七適緒倫甫四載夫故  
無嗣翁姑早逝煢煢無依惟倚祖母白氏晝夜績  
紡撫育弱叔學倫苦節十餘年始得成立授室過  
其子潤生爲嗣清操苦志允堪儀型巾幗伏俟旌  
表

邑人雷浙妻王氏年十八于歸生二子開春動春年

甫二十四夫歿仰天泣血幾不欲生以親老子幼  
不卽從夫於地下冰霜自凜手口拮据垂六十年  
如一日焉

邑人胡其秀繼妻劉氏庠生希桐繼母也性純謹執  
婦道善事翁姑三十餘年靡有間言教希桐有方  
篤愛尤至桐亦善承慈訓奮志讀書遂爲庠序之  
翹楚生三子與希桐相友愛氏亦一體視之無分  
彼此焉誠母儀之卓卓者歟

邑人李崇德妻任氏年二十四夫故無嗣矢志貞節  
清操凜然歷久不渝知縣李新猷給幽人貞吉匾

額以旌之

邑庠生單又桓妻柳氏年二十七夫故無嗣堅志守  
節事翁姑曲盡孝道及二親歿盡哀盡禮以婦道  
兼子道遠近稱之取長門次子經正爲嗣教以義  
方早年成立知縣李新猷匾其門曰節孝可風

邑人張志行妻黃氏年二十九夫故子方一週翁姑  
在堂氏矢志守貞孝事翁姑慈撫幼子伶仃孤苦  
備歷艱辛及翁姑卽世一切喪葬之事盡禮盡制  
未幾子歿亡慟傷之至遂亦尋歿其節孝洵可風  
云

邑人張邦勳妻王氏生員王作璣之女素嫻內則閨  
範靜穆十八于歸邦勳克盡婦道事舅姑以孝聞  
未幾舅歿年二十四夫故無嗣氏以未亡人奉事  
孀姑養生送死靡不盡禮過繼長房子得木爲嗣  
慈愛備至無異已出壺德堪式伏俟旌表

邑廩生趙廷球妻李氏節孝石氏冢嗣庠生榮桂之  
子媳也年十八適廷球越十一載夫歿氏乃勵志  
冰霜栢舟自矢時子幼翁病竭力奉事曲盡婦道  
和丸教子雖盛暑嚴寒不輟鄉里之貧不能學者  
又爲延師以教育之所成就者甚夥子馮登戊午

賢書孫承歡補增廣生員蓋皆氏餘慶云

邑監生許爾翼妻鄧氏年二十于歸爾翼越四載夫  
故孀居無嗣旣無伯叔終鮮兄弟矢志守貞奉事  
翁姑不以孤苦易其節翁常患癱症氏籲天求代  
茹素終身如一日焉邑令李公嘉其節孝爲擇嗣  
以繼之伏俟旌表

邑生員王統繼妻郭氏其前妻遺孤臣時方一週氏  
撫之若己出未幾氏舉一子文年十三夫歿家貧  
子幼日夜績紡並教育之二子克承母志前後相  
繼入庠人謂賢母卒年七十五歲

邑庠生李爾銓妻喬氏性嚴整明大義壯年舉數子不育勸銓納寵爲後嗣計銓曰此吾命也何以妾爲天苟不絕吾嗣爾豈不能生育乎遂不聽至乾隆七年氏年四十七自度終不能育勸之益堅且出其粧奩銀伍兩助成之嫡庶之間和好無間視其子女若已出焉陰險嫉妬者可以鑒云

邑人張汝謨妻王氏夫故時年二十七柏舟自誓之死靡他教諸孤以義方雖大寒盛暑莫之貸故其子皆卓然成就而少子正觀尤爲膠庠傑出卒年七十八歲

邑監生李紹韓妻趙氏年十七適紹韓時韓母張氏失明氏事之曲盡婦道及夫歿姑愈衰老遺孤爾彥未週歲氏事老撫幼敬禮恩勤愈於往時及爾彥成立娶張氏甫三載病故無嗣氏一痛幾絕誓不欲生張氏慰諭再三甘守貞節奉姑天年族人憐其節義爲立嗣子洽以主其祀一門雙節伏俟旌表

邑人閩豫妻徐氏年十七適豫逾三月而夫歿氏矢志堅貞冰雪自凜過其侄作梅爲嗣奉事孀姑終始不懈開封府丞趙公給匾旌獎卒年八十有四

孫寅邑庠生曾孫濟濟俱業儒人謂貞節之報云  
邑人王察倫妻魏氏夫早亡無子矢志冰霜之死靡  
他過其弟依倫子心誠爲嗣學政給匾旌之曰守  
節全祧

邑士人李慎已妻鄭氏生二子夫故痛哭幾絕對夫  
屍自縊而亡慷慨赴死節烈凜然伏候旌表

邑處士胡悅妻李氏年十九賦桃夭甫三載夫故無  
嗣氏仰天泣血誓不欲生旣而以翁姑在堂叔錦  
紳方二歲念無可代其責者慨然曰是子之任也  
於是上事翁姑下撫弱叔溫清愛養無間朝暮後

翁年老病且篤氏自刳股作羹以進翁尋愈聞之  
感傷命過錦紳子得木爲嗣氏亦撫之若已出歷  
三十餘年無逾初志云

邑人王三妻郭氏隣人許安強姦不從氣憤自縊死  
於雍正九年 旌表

邑人高黑妻吳氏房主劉然強姦不從氣憤自縊死  
乾隆八年建坊 旌表從祀節烈祠

邑庠生支方卜妻吳氏庠生吳玠女也年十八于歸  
方卜時舅姑俱歿惟祖父母在堂氏曲意奉侍無  
間溫清人以是賢之有堂弟可大五月失 祖父

母憐之氏抱養之提攜顧復二十餘年無懈志可  
大亦自振奮爲邑庠生焉

邑人李治方妻柴氏庠生在子母也年十八賦桃夭  
閱四載夫故遺孤方一週氏號泣不欲生旣而慮  
絕夫嗣乃矢志栢舟紡績教子苦節清操歷五十  
四年在子亦恪遵母訓爲士林翹楚云

邑監生李枚妻胡氏年二十二夫故其前妻遺孤述  
先方一週氏撫若己子朝夕紡績奉事翁姑苦志  
清節歷三十餘年述先始得成立補太學生天之  
報孀孤蓋不爽云

牛宏寬妻張氏年二十夫亡孝事舅姑家貧紡績

以資色養姑病年餘侍湯藥不懈邑令王夔龍

匾其門曰壺中孝行

